

ծերունին երկիւղածութեամբ մօտենում է փայտակոյտին, մըմնջելով յիշեալ աղօթքը, և տալիս է կրակ: Այն ժամանակ, ամենի աչքերը սեւեռվում են փայտակոյտի արծարծուող բոցեղէն լեզուների վերայ: Որքան այրումը սաստկանում է, այնքան էլ աւելանում է աղօթողների եռանդը: Կրակը հանգչելիս նոյն լուսով վառում են հանգցրած ճրագները և հայոց Տեառնընդառաջի սովորութեան պէս շատերը այդ լուսից բաժին են տանում իրանց տան ճրագները վառելու: Շատերը այրում են իւրեանց քղանցքի անկիւնը: Փայտակոյտի մնացորդ, մոխիրը շաղ են տալիս արտերումը:

Մասնաւոր մատաղներ միշտ լինում են, բայց Գարա—Գոյունցիք մի ընդհանուր մատաղի արարողութիւն ունին, որ տարին մի անգամ են կատարում:

Եյդ արարողութիւնը առանց կրօնաւորի չի կարելի կատարել, դրա համար գալիս է կրօնաւորը, որին շէյխ են անուանում, իւր ձեռքովը մորթում է մատաղացուն, եփում է, առանց ոսկորները կոտորելու, այնքան, մինչև ոսկորները ամբողջ բաժանվում են մսից, աւելացնելով մատաղի վերայ գինի և հաց նա հաւասարապէս բաժանում է բոլոր հաւատացեալներին, բացի երեխաները: Շէյխը իւր ձեռքովը մատաղի ոսկորները թաղում է: